

RADIO SCIENCE SERIAL
SUSTAINABLE DEVELOPMENT
'LIFE MUST GO ON- LIFE JAI THAKI BOLE LAGE'
LET'S PLAY OUR ROLE IN DEVELOPMENT
A-GE JABO NIMITE AMAR KHAN BI BHAK LOBO
EPISODE -01

E-bar noutun Radio Science Serial Prog: te, kisoman topic niche te, Sustainable Development upor te hunea hobo. Jai ja radio Science Serial Prog: te amar khan, disaster- beya ahea somoi khan te, ki kuri bole lage aro ahea pichot, kinika thaki bole aro kuri bole lage, etu khan huni she. Etu Science Serial Prog: tu, sop manu laap pabole aro hiki bole karone banai kena ani di ase. Aji huni bo aro aha kali pahuri bo, etu nahoi. E- bar laga series te, etea- etea laga ekela nahoi kena, ahi bole saal khan tak karone kisoman kotha huni pabo. Aji laga suru topic te na gushea a- got "sustainability" ba 'Sustainable Development' ki ase, alop koi dea hobo. Sustainability koa tu hoile, ecology thik hisap ekta te thaki- thaki bo karone, prakiti te thakea khan bhal para function hoi kena sop phele para dibo parea ke koi. Yate, jani bole ekta tu, amar manuhar khan, poila para history tu sai kena ahi le. amar khan nijor environment ke beya kuri di kena ahi ase. Aro jinda thaki bole laga raasta bon bi kuri jai ase. Sustainability he, duniya te, prakiti logot kinika thaki bole lage, tar ke kinika bachai rakhi bole lage etu bujai di bo. Amar khan etea tu, modern- aji kali laga nium te bohi ase, aro hodai din, prakiti para deya te mane- resources khan bishi khai di ase. Yate, amar khan bhal bana bole ba kuri bole tu ase. Hodai saal wapas rakhi dea nahoi kena, 40% tu cholai di ase. Etu ke botli kuri bole lage. Sustainability aro Sustainable Development he, lagea upor te ju-ja- ju-ji, technologically aro economically te a-ge jabile mon thaka aro, amar khan aro dusra khan thaka jaga te hawa- paani sapha aro thik rakhi bole kam kuri ase. Sustainability koa tu hoile, khali hawa- paani ekela bi nahoi. Amar khan laga gao. aro amar khan ki kuri kena beya ahi ase aro kinika kuri le, bhal hobo etu bi ase. Etu

bar laga radio Science Serial Prog: huni- huni kena jai le, Sustainable Development niche te ki- ki ase, etu huni bole pabo. UN para kiman ta Goals pungchi bole banai di kena ase, etu bi huni pabo. Listeners, hunea suru kuri bo, noutun series Prog: " LIFE JAI THAKI BOLE DIBO' kotha- patra te.

Voice:1 -Hello listeners, ami apunar khan laga saathi Chunglam ase.

Voice: 2 -Aro Ami Dzüvichü.....

Voice:1 -Huh! etu ki? dhamali naki? ami enika naam hunea tu, asuret lagi ase. Apunar naam Dzüvichü ase koi kena kaun bisas kuri bo.

Voice:2 - (Laughing)Chunglam, beya nabhabi bi. Ami ene dhamali kuri ase. Kile mane, duijon laga naam kiba ekta para mila bo nimite, ami koi ase. Mane- hawa paani, mati aro balu koa nishina, duijon naam bi.....

Voice:1 - Amar naam tu, upor- aakash koa tu, apunar kinika jane?

Voice:2 - Poila te, apunar ekbar koi she.

Voice:1 - Oh..... Hoi! hoi!

Voice:2 - Ummm.... hoitoh!

Voice:1 - Aro apunar laga tu, ami golti nahoi le, Dzü koa tu paani nah?

Voice:2 - Hoi apunar thik koi she.

Voice:1 - Hosa asuret ase, aro apunar kotha- kotha te koa tu bi, jinda thaki bole nimite, ekdom jaruri khan ase. Mane..... hawa, paani aro mati.

Voice:2 - Hoitoh saathi. Kintu asuret ekta tu, ami khan letra, moila aro beya kuri di she. Etu nimite, amar manuhar khan tu..... ulta phele jai ase. Ami kobo mon tu. u- cha para, niche nami jai ase. Sop jaga te, amar khan laga life aro kinika thaki ase, sop phele bi giri jai ase.

Musical SFX

Voice:1 - Achha, etea tu, dhamali nakuri kena, apunar bhal naam janai di bi, aro duijon laga kotha a-ge loi jabo.

Voice:2 - Thik ase. Namaskar! amar naam tu Jovi ase, aro (laughs) Dzüvichü nahoi.

Voice:1 - Enika khan upor te, amar khan beya lage dae! Jovi. Amar motlop tu, development (laughing)

Voice:2 - Huh? Kintu Chunglam, ami kitea bi, Maa Prakiti ke beya aro nostu kuri dea nai dae!

Voice:1 - Development mane- ki-ki banai kena a-ge hobole naam dhuri kena, amar khan, Maa Prakiti ke beya kuri ase dae! Buji she! (both laughs)

Voice:2 - Hoi, apunar hosa kotha koi she. Amar khan laga listeners khan bi, etu noutun series te ki kotha kobole ase buji pa hoi thaki bo. Toh....etu karone, etea para naam di dibo-- ' Journey tu, a-ge jabole di thaki bo', enika naam di dibo dae.

Voice:1 - Thik ase, amar khan bishi bhak manu, Global Warming tu hunea hobo.

Voice:2 - Etu mane, amar khan laga Planet Earth gorom hoi ase. Ami kobo mon tu, din- din te, temperature- gorom tu u-thi ase. Scientists khan mojit te bi, aji kali, etu kotha upor te ekdom koi u-lai.

Voice:1 - Hoitoh, hoile bi kile, khali aji kali karone> Ahi bole saal khan te, ekdom koi u-la bole kotha hobo bi pare dae, aro a-sol kotha hobo. Etu nimite he, United Nations Organization para Sustainable Development upor te, sop desh karone, goal ekta rakhi di she.

Voice:2 - Etu SDG, mane- Sustainable Development Goals niche te, ekta, nahoi le bi ekta- ekta desh para, UNO he, 17 Goals target rakhi dea aro, 169 agendas target pungchai dibo lage.

Voice:1 - Etu noutun Science Serial... Hindi te 'Chalti Rahe Ye Zindagi' aro engreji te, 'Let The Life Continue' he, apunar khan ke, Sustainable Development kotha upor te, a-lak, a-lak khisa ani dea hobo. Etu Prog: tu, khali science Prog: nahoi kena, amar khan hili bole ekta dea Prog: hobole ami umeed kuri ase.

Voice:2 - Bishi der nahoi kena bishi manu hilea, apunar dikhi pabo dae.

Voice:1 - Apunar eman mon dagor para, kinika kobole pari ase ho.

Voice:2 - Upai nai dae! dusra eku raasta nai. Amar khan ki phele hoi le bi, pungchi kena thaki bole raasta te ja bole he lage.

Voice:1 - Hoi. saathi- saathini khan, aro listeners khan bi, Earth laga temperature tu, u-thi ase. Borkhon paani bi hari jai ase. Apunar khan laga gao khan bi, jani thaki bo, gorom din bitor te, din bishi gorom - gorom hoi ja aro thanda din bitor komti hoi ja aro, tar din hoa laga bitor bi komti hoi ja jani bo.

Voice:2 - Apunar thik koi she saathi. Etea tak te tu.... saal 2016 tu sorse gorom saal thaki she. Ahi bole saal khan tu.... kiman gorom hobole ase, etu ami bhabi ase.

Voice:1 - Hoi hosa ase. Sustainable Development tu kile lage, etu upor te duijon a- lop kotha kuri bo dae.

Voice:2 - Achha thik ase.

Voice:1 - Manu 800 million nishina khan etea tak bi, dhukea te thaki ase, etu tu apunar bi jani thaki bo. Aro, bhukea te he thaki ase. Saal 2008 aro 2002 bitor te, natural disasters para, 144 million manu bohi bole ghor natha kea hoi jai she. Uthea bi uthi bo, kile mane planet tu gorom- gorom hoi jabo aro seas- samundar khan u-thi bo.

Voice:2 - Amar khan nium botli nakuri le, etu tu hobole he ase. Etea bi sabi nah! duniya te, paani komti hoi ja he, 40% manu ke choi dea ase. Aro bi uthi bole ae.

Voice:1 - Umhu... 946 million manu etea bi bahar jaga te latrine kuri thake. Toh Sustainable Development tu, ami khan lage. Parliament te, maiki khan nimite kiman bar- bar representation thaki le bi, maiki- mota eki nahoa etu bi, etea tak thaki ase. Etu khan nimite amar khan Sustainable Development lage.

Voice:2 - Hoi hosa ase. UNO para SDG upor te 17 points banai kena ase, 17 points majot sorse dorkar tu, duniya para, kinika poverty, mane- dhukea ke hatai dibo, etu tu ase. Etu pari bo?

Voice:1 - Pari bo Jovi. UN dictionary te, napari bo koa kotha nai.

Voice:2 - Hoi le bi Chunglam, dhuni aro dhukea majot, chet tu bishi- bishi, din- din te u-thi ase. Purikha kuri kena, kaun nuba tu koi ase, World Population te, 1% he, Earth laga ki- ki pa khan 50% dhuri loi kena ase koi, aro a-lak manu para tu, 80% World resources khan 1% ase koi.

Voice:1 - Hoi, etu nimate, 17 points te, tenth goal he, dhuni aro dhukea majot lamba chet ke kinika kuri kena komti kuri bo, etu te kam kuri ase.

Voice:2 - (laughing) Saathi, targets upor kotha nako bi dae! Hodai saal, bishi target banai rakhe. Hoi le bi ki hoi? Sop manu bi jane. Kaun nu bi tar khan laga dhuni tu, dhukea khan logot bhak nakuri bo.

Voice:1 - Etu karone, sorkar para kisoman dorkar kam khan kuri bole lage. Hoi na nahoi? (R) Dhukea aro sustainable development phele bishi sabole lage.

Voice:2 - Hoi, hoi. Narukhi kena a-ge jai thaki le he, targets khan pungchi bole pari bo. Achha! saathi, greed- thaki le bi, akobi lobole mon, etu upor te apunar ki kobo? Kaun nu ba expert khan koa hisap te, greed natha ki le, development aro progress naho bo koi.

Voice:1 - Jovi, (R) kaun tu development? Dhukea ani dea, bimar ekjon para ekjon ke dea, society te mili bole naparea, pu-ralikhea natha kea nimate, muk bon hoi joa, tar khan bana bole ba kuri bole parea ke beya kuri dea, apunar laga hawa letra kuri dea, paani aro mati ke poison kuri dea, khabole karone lagai dea ke dawai para poison aro paani bi cancerous hoi joa.... etu khan sop development ase dae. Etu khan sop tu, manuhar khan nimate, beya ekta ase dae

Voice:2 - Nai....nai...nai..... etu tu development a-ge jabole nahobo dae. Development tu hoile, sop manu Maa Prakiti ke bi milai kena laap pabole hobo lage.

Voice:1 - Hoi Jovi, apunar koa tu hosa ase. Development te amar khan sop bhak lobole lage. Amar khan jinda thaki bole dea maa prakiti ke napahuri bole lage, kile mane, tar para eman di ase. Goals khan bitor te, duita wala tu, duniya te kinika bhuka ke hata bo, tate para, gao bhal, mota- maiki majot equality- eki hoa, sapha paani, sapha thaki kena gao bhal hobole aro, sop manu lobole parea sapha fuels khan ase. Kotha a-ge naja a- got, saatra goals khan poila kobo dae. (R)

- > **Goals 1-** Ekta goals te sop jaga te, ki phele hoi le bi, dhukea khotom kuri bole,
- > **Goals 2-** Duita goals te, bhuk- bhukea khotom kuri bole, food security pungchi bo lage aro gao bhal hobo nimate, nutrition bhal aro kheti para pai thaki bole ki kurile bhal hobo.
- >**Goals 3-** Tinta goals te, Sop manu aro ki umer hoile bi, gao bhal thaki bole,
- >**Goals 4-** Charta goals te, Pu-ra likha phele, eki aro quality thaka, aro sop manu bi, jinda thaka tak, kiman pu-ri bole mon ase, etu dea hobo,
- >**Goals 5-** Paasta goals te, Maiki- mota eki aro maiki swali sop ke empower kuri bole,
- >**Goals 6-** Choita goals te, Sop manu nimate paani aro sanitation pai thaki bole,
- >**Goals 7-** Saata goals te, Sop manu ke, lobole parea, sustainable, modern energy di bole,
- >**Goals 8-** Aata goals te, sop manu ke kam di kena, aro etu para bhal u-la bole aro sustainable economic growth u-thi thaki bole,
- >**Goals 9-** Nouta goals te, Infrastructure bhal bana bole, industrialization ke promote kuri bo aro jai thaki bole aro noutun-noutun bhabana para ki- ki khan bana ke a-ge loi jabo
- >**Goals 10-** Dusta goals te, Desh bitor aro desh khan majot eki hobole naparea ke komti kuri bole, Jovi (R) apunar para baki goals khan tu ki- ki ase, puri kena hunai di bi nah.

Voice:2 - Thik ase.

- > **Goals 11-** Ekgaro goals te, Cities aro mnauhar khan thaka jaga ke safe aro eku dikdar lok nakuri kena a- ge jai thaki bole,
- > **Goals 12-** Baro goals te, Kha- loa, chola aro upjani patterns sustainable hobole,
- >**Goals 13-** Tero goals te, Din botli- climate change aro din botli hoi ja para beya ahea ke sabole aro kam joldi para kuri bole,
- > **Goals 14-** Chouda goals te, Sustainable Development karone, oceans, seas aro paani te pa khan ke bachai rakhi bo aro pai thaki bo nimate, thik para nahoi le ba hisap para chola bole,
- > **Goals 15-** Pondro goals te, Mati te eco system ke, bachai dea- bhal rakhea aro pai thaki bo nimate chola bole kam kuri bo, jungle

khan ke bhal para sa, khali ba suka jaga khan te, ki kuri le bhal hobo, tate kam kuri bole, aro mati harai ja khan te bi, kinika kuri le rukhai di bo aro bio- diversity noksan ke bi rukha bole,

>**Goals 16-** Sola goals te, Sustainable Development karone, shanti promote kuri bo, sop manu justice pabole raasta dea hobo aro, sop level te institutions khan bhal dea hobo,

>**Goals 17-** Saatra goals te, Sustainable Development karone, kuri bole khan ke dakat kuri bo aro, Global partnership ke akobi bhal bana bole.

Voice:2 - Goals khan tu, sai saile, sop ase dae! (R) Zero Poverty- dhukea bi khotom kuri dibo, zero hunger- bhuk- bhukea te thaka bi khotom hobo, gao bhal. pura- likha bi quality bhal, maiki- mota eku a-lak na sa nah!

Voice:1 - Hoi, yate, ami khan sapha paani, sanitation, sapha energy, moila- letra natha ka oceans aro mati.....

Voice:2 - Amar khan laga Indian sorkar para, etu khan sop pungchai dibo nimite, noutun policies aro kam tu kuri ase. Kintu saathi, aata point wala te ami nabuje. Tate koi ase, desh te, thik para kamyap aro economic products khan koi ase. Hoi le bi development aro environment tu duijon majot alak- alak ase nahoi?

Voice:1 - Saathi, Economy aro Ecology majot namilea tu poila para he ase. Etea tu, etu duijon bitor te milai di bole lagi ase. Economic, Social development aro hawa- paani ke bachai rakhea tinta tu, sustainability karone, pillar tinta ase. Bishi bhak national aro international khan ekta- ekta ke sai. Kotha- kotha, United Nations Environment Prog: aro EPA Environmental Protection Agencies khan, environmental- hawa- paani kinika ase, etu pillar ke sai.

Voice:2 - Hoi, World Trade Organisation para bishi bhak economic growth sai. Organization for Economic Co- Operation & Development para economic growth aro Social Sustainable phele sai. Etu tinta dakat hobo nimite, United Nations bishi khujis kuri thake.

Voice:1 - Hoi, hoi, hawa- paani nimate nabhabi kena, economic ke he a- ge loi jai le, ekdom beya para, environmental ke beya kuri di bo.

Voice:2 - Hoitoh! Estimate kurea hisap te, jai ja 50 saal te, Earth eco system te 60% te nami she. 2040 pungchi kena tu, prakiti te pai kena cholai dea khan tu, 170% pungchi bo. Toh.... bhabi sabi nah.

Voice1 - Duijon etea sustainable agriculture koa tu ki ase, etu a-lop kobo dae (R) Sustainable agriculture goal tu hoile, manuhar khan, ahi bole generation khan ke bhabi di kena, kha- loa aro kapra khan pai thaki bole, koa ase.

Voice:2 - Hoi, sop manu, mane- kheti bari manu, bana manu, dea manu- distributors, retailers, kha manu aro waste managers sop, food system te thaka khan sop, sustainable agriculture system hobo nimate, bhak lobo pare. Kheti bari manu khan, mati bhal hobo nimate, ki kuri le bhal hobo, etu chola bo lage, paani komti chola bole khujis kuri bole lage. Kheti te, pollution level ke namai di bo lage.

Voice:1 - Umhuu...sustainable agriculture tinta a-sol goal ase, etu tinta tu ase- environment health- sapha hawa- paani para gao bhal thaki bole, economic- taka- poisa phele laap ahea aro social aro economic duita eki ahi jabole tu ase.

Voice:2 - Sustainable agriculture a- sol tu, anach kiman u-tha bole pari she aro environment eco- systems ke bachai rakhi bole tu ase. Kheti bari manu khan bi, taka- poisa duk napai kena aro tar khan laga jeevan bi ako bi bhal hobo nimate ase. Sustainable agriculture para ki laap pai, etu upor te a-lop kobo dae duijon. (R) Yate, amar khan lagea life jai thaki bo nimate, hawa- paani mane- environment bishi dagor kam kure. Hawa- paani para, amar khan ke, eman sai di ase koile, amar khan hawa- paani ke sapha rakhi bole, amar khan laga kam nahoi?

Voice:1 - Hoitoh, ahi bole saal manu- future generation khan ke bi bhabi di bo lage.

Voice:2 - Etu nimate, amar khan deri nahoa homoi te, suku khuli bole lage. Jati ekta harai jai she koile, etu noksan tu prakiti te ki-

ki pa khan upor te dikdar ani de. Sustainable development tu, prakiti te pa khan upor te depend kure.

Voice:1 - Jai ja a-lop dcades khan te, amar khan, bhabi bole naparea tak te, prakiti te thakea ba, prakiti para deya, etu upor, kati dea, khundi dea, nahoi le ba, bishi cholai dishe. Amar khan laga leaders khan aro public khan etea tu, kiman tak te etu tu beya ase, bhabi loi she. Etu nimate, amar khan sustainable development kotha koi ase.

Voice:2 - Umhu... jai ja dui century bitor te, prithibi te, manu bishi- bishi hoi jai she. Natural resources lagea bi bishi- bishi u-thi she. Aro, amar kanuhar khan tu, eman hoi le bi hoi jabo, etu naitoh! (R) Kitea hoi le bi, prakiti para deya upor te ekdom haat jabole mon jai. Khali haat ja ekela nahoi kena, control bi kuri bole mon aro kure bi kure.

Voice:1 - Hosa kotha koi she. Amar khan laga greed he, prakiti laga balance mane- thaki bole hisap te narakhi dea. Manuhar khan para ekdom joldi- joldi para beya kuri di ase. Bhabi sabi nah! amar khan Earth, tar cycle balance hobo nimate, thousands aro millions saal lagi she, amar manu khan tu, hodai pai thaki nishina cholai ase. Amar khan jinda thaki bole etea tu, ekta raasta he ase, etu tu 'Sustainable Development- khotom naho bole kamyap jai thaki le he amar khan, pa aro khai thaki bo.

Voice:2 - Saal 2015 te, United Nations he, sop desh nimate, sustainable development upor te agenda banai sele. By 2030 te etu agenda pungchai di bole laga ase. Judi, sop desh khan, agenda te rakhea khan upor te kam kuri di she koile, ahi bole saal khan te, ekdom dagor botli dikhi bo.

Voice:1 - Etea tu, Gandhi ji para ki koi kena thaki she, etu laga piche kuri bole lagi she. Tar para ki koi she koile, mati te thaka sop nimate, tar khan ki lage, Mother Earth dibole pare, kintu, tar khan laga greed- loi thaki bole mon ja ke dibole napari bo. Mati te ki- ki thaka- resources khan, tar khan lagea ba, loi thaki bole mon-greed para khotom hoi jabo koi she.

Voice:2 - Gandhi ji laga kotha tu, apunar ekdom bhal para koi di she. Hosa kotha ase. Greed he amar khan ke morai di bo. (R) Purikha kurea ekta dikhea te, Earth te, judi sop manu bi, American

manu khan nishina thaki ase koile, amar khan laga Earth para, ekjon nahoi le ba sop manu ki lagi ase, etu khan dibole naparea hoi jabo koa dikhi pai she. Amar khan aaram thaki bole, Earth para dibo koile, saata earth lagi bo.

Voice:1 -Chunglam hoitoh, hoitoh, desh u-thi kena he thakea laga kam bishi ase. Amar khan laga planet te, sorse development tu, America hobo para, kintu, tar khan green house gases bishi u-la bole dea.

Voice:2 - Japan Quito city te, monjur hoa ekta signed kuri sele. Hoile bi etu developed -u-thi kena he thakea desh khan, Quito Protocol laga agenda sign kuri bole monjur hoa nai. U-tu homoi te, green house gases aro carbon dioxide level ke 300-350 ppm te rakhi bole kotha hoi sele. Etu mane, ekta million parts te, greenhouse gases laga ekta part bi na u-thi bole kotha thaki she. Kintu 2016 saal te, bhoi thaki she, greenhouse gases level tu, 400 ppm te u-thi she.

Voice:1 - Jovi, ki bhabi loi kena ase koile nah! (R) amar khan poila para kinika thaki she mane- original lifestyle te, ako wapas jai le bi, carbon dioxide level ahi bole, 100-150 saal tu lagi bo.

Voice:2 - Enika hobo. Amar khan golti kam kurea te, haat dhulai dibole bishi dikdar hobo. Amar khan Earth te, prakiti para deya khan nachoi kena bi, ekdom khushi aro dhun para thaki bole pari bo ase.

Voice:1 - Sustainable Development kotha mani le nah?

Voice:2 - **(laughs)Hoi. Thik koi she.** Duijon etea health- gao phele koile, bachha morea ke bi namai di bole target banai kena ase. Sub- Saharan Region te, 17000 bachha, jonom nahoa a-got nahoi le ba, jonom hoa loge- loge mari jai. Etu huni le asuret bi ase. (R) Tate, bachha dus jon majot, ekta tu, jonom hoi kena, paas saal pichot mori jai.

Voice:1 - Etu tu hoile u-thi kena he thakea desh, mane-developed countries khan para bi pondro bar bishi hoi she.

Voice:2 - Hoitoh, etu nimite, bachha morea ke kinika namai dibo aro kinika rukha bo, etu tu, duniya karone sorse dagor challenge hoi she. Yate, pet te bachha thaka amma ke napahuri bo lage, tar

pukhea bitor para loi kena jonom dea tak tar gao bhal thaki bole lage.

Voice:1 - Aji kali tu bimar bi kisim- kisim u-lai ase.

Voice:2 - Hoi, etu karone, sustainable development koa te, Bio-technology para kam dagor para kuri bole pari ase. Jai ja decades te, khali malaria para, ek million manu mori she.

Voice:1 - Ek phele, amar khan, Tuberculosis para, ek crore manu ke bachai dibole pari she.

Voice:2 - Hoitoh. Achha! duijon ses nakurea a-got, hunea manu khan laap aro bhal para buji pabo nimite, sustainable development tu ki ase, etu ako ekbar koi di le bhal hobo naki....

Voice:1 - Ekdome bhal bhabana.

Voice:2 - Brundtland para koa tu hoile, etea amar khan ki lagi ase, etu khan pa nishina, ahi bole saal khan te, mane- future generation khan bi, tar khan bi, ki lagi bo, etu ke bhabi di kena, ki kuri le bi hisap ekta te chola ba thaki bole lage.

Voice:1 - Umhu..... aro mon te rakhi bi, amar khan pai thaki bole nahoi le ba, a-ge jai thaki bole, sorse dorkar tu, amar khan laga natural resources- prakiti para deya saman khan tu ase.

Voice:2 - Aro, kheti kam nimite, pharmaceutical- dawai bana aro dusra bio-technology industries khan nimite, gaas-paat aro juntu-jaanwar jati khan laga genetic samaan tu lage.

Voice:1 - Etu khan sop jani thaki bo nimite, sawal hudi bo, SDG tu ki ase?

Voice:2 - Apunar khan mon te rakhi bi, SDG motlop tu, Sustainable Development Goal ase.

Voice:1 - SDG niche te kiman ta goal banai kena ase?

Voice:2 - Saatra Goals banai kena ase. Aro etu goals khan te, kisim sorkar khan, policy bana khan, aro scientists khan logot, amar common manu khan, dagor jaga lobole lage.

Voice:1 - Enika hoi le he, amar khan sop eki logot khushi para, a-ge ja suru kuri bo kobo pari bo.

-THE END-

